

108 年全國語文競賽客家語朗讀文章高中組（詔安腔）

編號 01 號

【兩媽孫】劉玉蕉原作

風涼涼，日頭猶藏在山後背，佢即陪阿媽去公園行路啊。公園內底，運動個人無幾多，毋過，怪奇个係，逐儕攏識阿媽。「阿財嫂，出來運動哦！孫女恁乖，真得人惜哦！」阿媽个老朋友毋會少，堵著一個問一擺，阿媽微微笑真歡喜，佢嘎歹勢到歸晨早面紅紅。放暑假啊，假使佢逐晨早陪阿媽行路，慣勢啊，佢人應該毋會攞問正著。

在轉屋下个路，睺著一個老伯攞渡孫在巷路坐寮，遐個阿媽个腳尾瞪啊瞪，腳膝頭即跔在一上一下扞啊扞，坐在膝頭面上个阿侬，暢到嘴合毋會密，阿侬笑，遐個阿媽嘛笑，嘴念佢兩儕正聽會識个事。佢擎頭睺一下阿媽，佢嘛微微笑！這個畫面，真熟事，對古早傳啊傳，傳到佢這代抑後次代攏共款，係真得人感覺燒暖个一幅圖。主角直直換，親情無變，佢嘛係像恁得阿媽扞大漢个。

一站路無幾長，兩媽孫个事真多。佢講佢細漢遐時係愛嘍个阿侬，足愛嘍个。講佢黏佢黏核核，一無睺著人即嘍，逐儕仰子惑攏毋會恬，正係嘍討尋阿媽，所以渡佢變做佢頭大个事。揸著

佢，佢愛顧菜園，愛洗衫、煮食，驚佢得蚊叮，隨身會隨細罐麻油，想著即提來掌一下佢个手腳和面。洗衫遐下，扞佢揸在背脊駢，衫著面洗著面揸，猶攞愛直直唸。佢講洗衫無幾恂，渡佢實在正有恂！聽到這，佢攞一下阿媽，燒暖个感覺無變，遐輕輕柔柔掌麻油个手，猶留在佢个心肝底，麻油个香，在空氣內底，到今嘛猶言散。

阿媽惜佢，正經係惜入心。阿怙、阿依長年賣果子生活，逐日三更半夜即愛出門割貨。猶係阿侬个佢，對滿月起，日連夜攏愛跔阿媽食和睡。食肚枵啊，尋阿媽；跌倒啊，喊阿媽；頭燒額頭疾、歡喜慍悴，一路來，陪在佢身脣个人，攏係阿媽。佢和阿媽兩儕足親个！一半擺講事即會毋知進退，嘛因為恁佢恬恬會得阿怙罵，講佢無大無細，欺負佢个阿依，毋過，容佢个阿媽猶係笑笑毋會氣。佢个笑，係知佢、信佢。有恁个阿媽，佢實在足有福氣。

阿媽个腳尾瞪啊瞪，腳膝頭扞啊扞，扞啊扞。佢大漢啊，拳頭嫵有力啊，阿媽啊！歇睺下，換佢來扞你捶背脊駢。

108 年全國語文競賽客家語朗讀文章高中組（詔安腔）

編號 02 號

【燈籠】賴文英原作

成過，逐年正月半個燈籠節，屋邊頭尾個細子，攞會招作埕，自家來做自家個燈籠。所以，俚人燈籠個材料即用遐兜手脣便便會用個，有菜頭、銅笕、紙這兜。俚頭愛菜頭透出來個光，遐係用湯匙拗菜頭中央個肉糝空。當然，糝出來個部分猶係會用煮來食，假使恁即拗擊莫，即傷打爽啊。老輩個人總係會得俚人細子一個觀念，會用用個抑係會用食個物件即毋好儘採打爽莫，假使講若恁拗抗莫，這即係「折福」。

燈籠做好，大家在暗摸胥疏個暗夜時，逐個手頭攞有一盞燈籠。攞著燈籠，覘到禾坪、田脣、竹林內、魚塘脣，滿哪位去探險，感覺恁賞真心色。在四角輪轉無光害個莊下，正有月光和星光個夜色，猶攞有火焰蟲和燈籠光照俚人、指引方向。遐時務，大家猶會共下念唱一條在莊下真時行個童謠：

火焰蟲，唧唧蟲，楊梅樹下吊燈籠；燈籠光，照四方，四方暗，跌落炭……。

這個時代，在元宵節進前遐站，街路滿哪位攞睭會著店面掛花喇必駁個燈籠。為著錫小朋友來買，有百百款個造型，歸下攞

係塑膠製品，重點係毋使攞點蠟燭啊，大概嘛係為著蠟燭火會隨來危險，驚細子無注意嘎火燒屋，所以，這下攞係用電火球個燈籠。單單一個開關，裝電藥，摩落去，電火即著啊，攞摩落去，電火即會關莫啊。在屋下暗摸摸個所在，一開一關，燈籠光嘛即一光一暗，細子人即享受著恁個氣氛。毋過，細子賞到足歡喜過後，遐個燈籠毋係因為壞去得人擊莫，無即新鮮感無去啊，得人擊在脣頭園，毋會攞得人睭重啊。落尾，遐猶係得人準做垃圾，得垃圾車載走。現時係物質算係罇用個時代，毋過少年人敢會知麼個號做「做惜」，麼個號做「折福」這兜詞彙正經個意涵咧！

想想個，猶係真思念成過個燈籠節！雖然時代一直在進步，物質嘛越用越好，毋過，俚人應當愛思考，愛仰子拗成過文化「做惜」和「毋好折福」恁好個意義，一代一代篤篤實實傳承落去！

108 年全國語文競賽客家語朗讀文章高中組（詔安腔）

編號 03 號

【糟嫲】何秋桃原作

逐擺在寒天俾過年个時務，佢即會想著阿依做个「糟嫲」。紅漬漬个糟嫲即像年个代言人，拚勢用佢一身个紅色，猶擱有糯米發了後个酒香，合落俾年个喜氣，隨來一種福氣个感覺，嘛係預告過年討到位啊！枵鬼个細子，言曾言即頭勾勾直直望，望若係有一支糟嫲雞髀抑係糟嫲雞腳好喫，毋知有幾好。

阿依做糟嫲个功夫一流，酒香歸屋間，佢猶會用豬肉、雞肉、鴨肉……變出好食个糟嫲肉。過年時務，桌嶼定著會有紅紅香香又錫人食个糟嫲肉。兄弟姊妹睭著這盤菜，逐個目金金，拚緊緊，無幾久大家即食到恬卒卒，無閒好講事，手指公喇到唧唧啲。阿依總係會在脣頭大嫲聲講：「毋好恁貪食，愛留一兜仔得你阿怙食哦！」

冬節前後，阿依即會開始做糟嫲。佢講：「做糟嫲毋會用儘採，尤其係紅麴頭要緊，愛擇較好个來用，發酵若無發起來，遐即會像菜籃擔水做白工；另外酒愛用純米去焗个正會香，糯米愛用圓个正會補。」做糟嫲愛先炊糯米，竹籠床鋪好版布，拗洗好个糯米漕落去；愛用文火，毋好傷猛，即會炊出虬虬擱有竹香味

个糯米飯。逐擺睭阿依開始炊糯米，佢即在脣頭顧蹠，睭等下會用先分著一碗來食無？阿依會笑佢講：「真枵豺哦！猶言好，即枵壞壞，枵鬼係無。」在遐無麼个四秀个年代，無枵豺即毋係細子啊！

糯米炊好愛先因在桌嶼得佢冷，擱來紅麴用酒先浸蹠，講麼个恁發酵正會發較靚；等糯米冷了後，擱拗紅麴、酒歸下漕落去共下攪得佢勻，頭尾裝入醃缸封起來即好啊。個半月了後打開來睭，會鼻著一臨臨个酒香，遐原本一粒粒啲飽酒个糯米，發酵了後，自家嘛會焗出酒，變到像糜个樣，歸醃缸个糟嫲紅到真得人惜，到恁即表示會用食啊。討食糟嫲肉，即拗肉先焗熟，濾水濾燥，因落糟嫲醃缸內底去浸蹠，大討一、兩禮拜即會用上桌！這兜肉食起來有香香个酒味，毋會油、毋會畏，總係錫到人个舌忍毋會核蠕蠕動起來。

糟嫲即像美食个奇術師，料理千變萬化：煮卵酒、炒飯、炊魚抑係單單攪飯攏會用，毋單好食猶會用補身體。今年過年佢決定自家來做糟嫲，透過做糟嫲个過程，擱一擺感受阿依个燒暖。

108 年全國語文競賽客家語朗讀文章高中組（詔安腔）

編號 04 號

【快樂 50】張旭英原作

記得係佢讀高中個時務，這臺「快樂 50」嘍仔即牽轉來屋下。佢係佢怙第一臺騎個嘍仔，進前佢怙個交通工具毋係騎鐵馬即係坐巴士。

佢退休個阿怙上下班騎「快樂 50」去學校，退休了後去宮廟做義工，猶係騎「快樂 50」來來去去。「快樂 50」猶有一件真要緊個任務，即係歇暎日愛載佢依去市場買菜。遐暎子細子攞講「快樂 50」係「買菜車」。佢依生做肥漬漬，見擺睭佢怙騎「快樂 50」載佢依去買菜個背影，即感覺佢兩儕若像討去約會共款，佢依個心情應該係歡喜個！毋過「快樂 50」毋知佇會核無？逐擺菜買轉來，屋下人即知有好料理食啊！

落尾佢怙做阿公啊！「快樂 50」擱增加一件任務，即係愛載孫去惹街，惹啊惹！孫即睡去啊，遐暎子個「快樂 50」係「搖籃車」。逐日食飽當晝，孫即會提安全帶得阿公，講討去惹大路、睭火車，阿公即提鎖匙，牽嘍仔出來，拗孫攙起去「快樂 50」坐好勢，擱拗安全帶緝好勢。出發啊！兩公孫個心情應該係歡喜個！

佢一直無機會坐「快樂 50」，等佢去外地讀書轉來討擱倒轉去學校讀書，愛去車頭坐車攔車班個時，佢怙牽嘍仔出來載佢去車頭，正有機會坐著「快樂 50」。逐擺佢怙攞會量早一兜仔時間出發，係驚佢無赴著車班。遐暎子個「快樂 50」係「親情車」，佢感覺足福氣個。毋過和頭前講個「買菜車」、「搖籃車」無共個係，兩子爺個心情因為討分離，應該毋係歡喜個！尤其係佢坐上客運，車發動討出發個時，睭著阿怙騎嘍仔離開個背影，佢個目汁毋知仰子即流出來。

客家老儕事講：「爺哀惜子長江水，子想爺哀擔竿長。」爺哀關心子女個心，遠遠即較多過關心自家。這下回想「快樂 50」係三、四十年前個事情，佢怙過身嘛二十外年啊！佢怙猶在個時務，佢一溜毋識載過阿怙，佢嘛毋知佢怙鬥底換過幾多臺嘍仔，毋過，佢正知「快樂 50」這佢怙個第一臺嘍仔，隨得歸屋下人足多歡喜。

108 年全國語文競賽客家語朗讀文章高中組（詔安腔）

編號 05 號

【竹凳伯變个大手巾】楊世玲原作

歸莊頭个人睺著佢兩公姐，歸下攞喊佢人竹凳伯和竹凳伯變。因為蹠佢人對面个阿女、阿郎和佢係屋邊，佢即跔佢人个三個外孫喊佢人「外公、外媽」。老儕蹠个細瓦屋，無禾坪，正有一間屋，藏在竹籬門牆內底。廳下有一個棚，一入門个倒裡，有園一支竹梯，討用个時，即徙好勢，跋起去棚竦尋物件，普通時即得佢憑壁企在灶下个門脣。論真講起來，歸大個棚竦，正年尾討賣豬个時務會用著个大量以外，歸下攞係佢兩儕討做桌凳和籃簾个竹料。

竹凳伯變有一條大手巾，毋知本來係麼个色。佢記得在兩、三歲去佢屋下過家寮个時，睺著即係烏黧紅、烏黧紅个色，猶擱有花花个印跡，毋知係本來个花草，抑係洗毋會啟个屙糟底。逐擺熱天个時，遐條大手巾，總係吊在竹凳伯變大衿衫个布鈕空遐位，掙汗、掙嘴攞毋使啟落來。寒天个時，遐即準做一頂擋風擋寒个帽。竹凳伯變和睡嘛包个，毋使講佢毋盼得啟落來，佢猶較無愛睺著竹凳伯變拗啟落來。

佢記得第一擺睺著這條大手巾得佢啟落來，即係跔佢共下去

菜園掘番薯遐擺。佢得趁出來个蛇驚著，鏝頭偏去，嘎來掘著佢个腳趾頭。佢驚到哇哇嘍，佢對大衿衫个布鈕空啟落遐條大手巾，拗流血流滴个腳趾頭緝纏擱纏个，擱番薯籃，牽若行若嘍个佢，轉到細瓦屋，扯爛一支竹凳伯食个薰，啟開手巾拗薰絲園在爛綿綿个腳趾頭面上，共款擱拗纏倒轉去，即跛啊跛行去灶下爇豬菜啊。第二擺係渡佢去溪脣，割討炙來網草網个菅榛花，鏝鐵對佢个手指尾劃過，黏時血即噴到歸草墩。佢這擺驚到嘴擘擘，嘎嘍毋會出聲，佢啟落包在頭拿竦个大手巾，拗歸支手婆纏到纏纏，撿起腳前个鏝鐵，像無礙著个款，草即擱割落。第三擺即係送佢个阿女和阿郎去車頭轉來，佢拗手巾揜在面面上，睡在眠床竦，歸臉身直直顫。雖然無出聲，佢睺會識，佢係在遐嘍。落尾聽講佢个阿女兩公姐，一儕攞一個無好醫个細子，去臺北得先生睺。

竹凳伯變个大手巾，包著客家夫娘人个堅持和認份、嘛包著客家阿依、阿媽對子孫个關心和愛惜！一條走色擱粗粗个大手巾，包著个係一等溫柔、恬靜擱實在撿擘个客家夫娘人个心！

108 年全國語文競賽客家語朗讀文章高中組（詔安腔）

編號 06 號

【麻竹坑】陳宜楠原作

無講毋知好，毋講你毋知，拗你紹介一個心色个所在。這跡位，春夏秋冬，一年透天攞真靚，真錫人，無論係愛睇山景，抑係愛跋山个人，來到這，定著會得你歡頭喜面，歸日，毋知好轉。

客人莊个麻竹坑遐跡位，你識聽過無？遐在臺中市新社區，較接近和平區，佢東勢方向大甲溪个東片，號做天冷，過了天冷橋，遐大甲溪个西片，正號做麻竹坑，福興係里名，成過種真多麻竹，正號做麻竹坑。

遐有幾闊，你知無？來做一個例得你知。大臺中市个行政區，新社區个闊即排第二，本區十三里，福興即占一半个面積，一個里闊過歸個石岡區，比遐世界小島國，諾魯个土地不止大十倍。

九二一大地動了後，麻竹坑發揮客人晴耕雨讀个客家本色，社區總體營造比賽，全國著頭名。麻竹坑，山靚水清好地理，這跡位有歸大陣个客家子弟，這跡位有醜醜个人情味。屋簷水點點對，上輩對下輩，客人忠孝傳家个傳統，在這跡位逐位攞係。

客人係靠山絡食个民族，佢靠佢人開山打林个膽，在這歸山錫人食个果子，白毛臺个葡萄、柑子，頭批、二批个枇杷、甜柿，做一下國內有名聲，國外真出名。

大圳溝白冷圳个源頭係大甲溪，佢流對麻竹坑个脣頭過，這相連續無斷个水，蔭偲人个土地和園以外，擱得偲有水好用，食水都利便。麻竹坑个青色天嶼，不時會有一陣一陣个白卵鷺飛過去。熱天个時，清清个溪底，會有大人細子在遐賞水、藏水汨。麻竹坑个大廟福天宮，香火興旺，庇佑大家平安順序。

「二餘草堂」係本社區「大林國小」詹進有先生退休了後，自家規畫用心起个。佢希望社區大大細細在「學業」、「農事」以外，老老嫩嫩來學寫大字、學手藝，遐跡位即得人睇會著客家文化傳承个前景啊。

這跡位个大鼓陣，嘛代表麻竹坑客家音樂和精神个傳承。鼓聲，一臨一臨響起，摧響土地个生命力；鼓聲，一臨一臨擱響起，傳出聽著社區个福氣和未來。有閒來寮，甜甜个果子在遐等你；有閒來寮，靚靚个好山景，在遐等你；有閒來寮，醜醜个人情味，在遐等你。

108 年全國語文競賽客家語朗讀文章高中組（詔安腔）

編號 07 號

【巡田水】郭亭好原作

自係知天地起，屋下即在蒔田。阿怙種作个田離水頭較遠，愛「開陂作圳」，正有水好蔭田。若係想討用共條圳溝水个人，即愛共下來鬥相共開陂塘、作圳溝。圳溝用久會漏水，大家猶愛共下來作圳補漏，拗圳溝修好勢，恁，大家用水正會利便。

愛用著這條圳溝水，即愛輪水鬮。照理講，輪著別儕用水，大家即愛守規矩，讓水得人用。頭驚堵著有私心个人，會拗別儕个水偷偷引去自家个田。因為恁，輪著種作水尾田个阿怙蔭水个時，恬恬半夜愛去巡田水，驚有人會偷引去用，自家个田即會毋罈水好蔭。

有時輪著半夜蔭水，阿怙、阿依即愛去巡田水。阿怙个膽較大，總係自家擎電火即去田底，上上落落、行來行去顧田水。若係有堵著水得人引去，佢即攔緊搬大石頭去拗水引轉來。阿依較無膽，輪著佢个時，恬恬會半夜拗佢搖醒，喊佢和佢做伴去巡田水。當愛睡得阿依吵醒，實在真艱難，想討韌皮毋起來，毋過又毋盼得阿依自家去，佢猶係半睡半醒，揪阿依个衫支尾，拖拖擲擲、半行半走跔阿依去田底。

猶記得有一擺，更深夜靜，佢人在田脣巡啊巡，嘎睜著遠遠个大樹下，有一個著白衫个人藏在大樹後背。佢人驚到嘟嘟顫，兩儕个手牽纏纏，和大氣攏毋敢啟。等真久，遐個人無行俛來，佢人嘛毋敢行進前，即恁直直等到天普普光。

落尾，阿依佇毋會核啊，揪佢慢慢行俛去，睜遐個人鬥底討做麼个？短短五、六公尺遠个路，佢人緊張到流歸身汗。真無簡單到位大樹下，一睜真，佢人兩子哀嘎笑出來。幾時係有人因一墩肥料在大樹下，擱用白色个布篷拗揸蹠。遐布篷得風吹到膨膨，真像有人著一領白衫企在遐。阿依講：「阿依哦～自家嚇自家，硬硬討嚇啟一緣皮啊！」

和阿依共下巡田水，早即係幾下十年前个事情啊！到這滿，嘛毋記得當時有幾艱難，正記得遐站時間，阿怙、阿依為著得佢人有較好个生活，牙根咬纏打拚，實在真感謝。

【 晡蹠 】黃美貞原作

在大落屋大漢个細子，總有講毋會煞棚个心色事。無論係辦家貨、擎攬跤、抑係點妖精、焯番薯，有三、五儕共下寮，遐下晝又係一個歡喜个好日。

佢頭記得賞點妖精个時務，歸大落屋係佢人个遊戲場，時間一到，講嘛怪奇，這兜山猴陸陸續續對屋下從出來。上屋个阿雪、下屋个阿勇、隔壁个阿明頭，猶有竹園內个阿隆，鬥起來大討有十儕，大家在公媽頭前个大禾坪集合。攘拳好勢，贏个人揸面偷笑，早即想便討藏个所在；輸个人面即撇一裡，心肝底想這闊茫茫个大落屋，愛對哪位尋起頭。伏在樹頭對一算到一百，頭那幹轉來，無睺著半個鬼影，正係擘心个起頭。

有一擺，輪到佢做鬼，一百算了目珠擘開，四角輪轉恬卒卒，探頭睺過去，和大隻狗嘛毋插佢。一儕呆呆坐在樹頭下，起驚神真久。黏時想著作穡人等兔子个老故事，無定著會有人自家送入門來，顛倒比佢去尋較緊，晡蹠一定有希望。佢越想越暢，自家嘎笑出來啊！佢先跔在圍牆下，目珠像鷄婆共款，目直直監督別儕个行動。過了成十分鐘，阿雪即鼻搭蹠對牛滌走出來，準

備摸樹頭。佢想講鬼出去捉人，無提無防。佢在佢个屎肫背大喝一聲喝：「捉著阿雪啊。」續落來，阿珠嘛對竹頭下從出來，又得佢捉著，佢講：「若擱藏落去，佢硬討得蚊扛去。」阿勇轉屋下食柑子糖，食到囟嘴囟鼻，手底猶有餅香，對佢个屋下行來，毋使講又得佢捉著啊。天色漸漸烏昏啊，時間嘛差不多啊，佢放勢大聲喝：「放——牛——食——草！」大家黏時笑嘆嘆，三步做兩步腳從出來，拚勢展自家藏个好所在，做鬼个尋毋會著。

準備討轉屋下个時，阿隆著驚一下講：「欸！仰子無睺著吊尾錘，佢鬥底藏到哪位去啊？若得魔神仔牽去即火燒畧寮——壞了了！」阿雪目汁含蹠講：「佢依有交代，阿弟愛渡好，這滿愛仰子正好。」人愛靈通，火愛閻空。好得伶俐个阿珠想著：「普通時，吊尾錘頭愛賞香腳，恬恬賞到歸身紅吱吱，無定著猶賞到毋知好醒哦！」大嫲陣个人即行到田頭伯公下，睺著佢个手拖歸拿香腳，伏在神桌竦睡去啊，面頰卵猶有吉燥个口涎水。大家攏笑到佇毋會核，佢正擘嘴擘鼻講：「你人在這位做麼个？」又係一陣笑聲，這場晡人个遊戲正煞。

逐擺睺著細子人賞點妖精，佢總會想著自家一儕，恬恬跔在圍牆下晡人个時，遐幾下分鐘，感覺像過了一點鐘恁久。

【思念阿公】曾秋梅原作

猶細漢個時，跔爺母蹠在北部，遐暎子，佢正讀幼稚園中班，係無操無煩個年歲。一到歇暎日，即會吵爺母渡佢轉去老屋，因為老屋有佢真愛賞個所在——禾坪，猶擱會用走到闊茫茫個田賞遐賞這，自由自在。遐時務，阿公猶真勇，見擺佢人轉到老屋，睭著佢即暢到拗佢攬纏纏，直直講：「在屋下有乖無？去學校有聽先生個事無？」阿公知佢無一時間，蠕蠕動，若像屎缸蟲，坐毋會核，係牛獺擱狡怪個細子，嘛係佢頭擘心個孫子。

一個秋天個烏昏，阿公牽佢個手，行在青溜溜個田塍路面上。佢像草蟻個款，若行若跳，恬毋會落來，直直想討滾絞開阿公遐攏係老人斑擱粗粗個手掌。阿公拗佢個手搭到纏纏，毋得佢離開佢個身脣，驚蠻皮擱愛賞個佢一無細義會跌倒。

滾啊滾，佢滾敲阿公個手，暢到一下子去躡野花面上跳舞個蝶，飛來飛去個蚌蛻；一下子去捉菜園內底個蛎子；一下子擱去承田頭脣滄出來個泉水淋。毋過佢嘛不時斡頭去睭阿公，驚阿公毋見去。

日頭漸漸子消失在田園樹尾，佢賞恻啊，仆在阿公個背脊駢

面上，無擘無心睡到齁齁嘍¹。阿公硬硬擱康健個臉身，揸佢款款子行轉屋下个路，毋敢大步行，驚吵醒揸在背脊駢面上猶在發夢躡蝶個佢。

十外年後，佢大學出業，轉去莊下老屋，會用食著伯饗煮個客家封肉以外，頭要緊個係陪阿公泡茶、答嘴鼓。遐日烏昏，阿公愛佢扶佢去田行行個，正發現著阿公無像成過恁勇啊，略略仔背痠痠，腳步款款擱慢慢，阿公老啊！阿公拗佢個手搭纏纏，這擺，毋係討保護佢，係驚佢自家腳無力會跌倒。在田，早即睭毋會著真青個禾浪，正睭著歸大片個檳榔樹，阿公搖頭發出輕輕個嘆氣聲，佢感受會著阿公遐份辛酸。

阿公坐在礮塍面上，像燒過個蠟燭，虛虛個燭火。佢細細聲拗佢講：「成過，這就近攏係荒涼靠天絡食個田，這滿牛車路變大路，嘛起真多靚擱氣派個屋。你將來定著愛上進轉來，起大間個屋得你阿怙佢人蹠。」佢睭一排排筆直個檳榔樹，對阿公講：「佢毋會得你失望個，阿公毋使擘心啦！」阿公聽著佢恁講，歡喜到笑出來，滿足個笑容，充滿希望個目神，即像遐年睭著足牛獺個佢共款。

無幾久，惜佢個阿公過身啊！出山遐日，佢人歸屋下人攏真毋盼得阿公離開，目汁濫泔跔大屋後背，陪阿公行人生在世頭尾個路。

¹ 齁齁嘍：音 honn^ honn^ bui^；鼾聲連連。

108 年全國語文競賽客家語朗讀文章高中組（詔安腔）

編號 10 號

【灶頭舊事】徐秀英原作

過年前，僱屋下請油漆師傅來油漆。師傅講，你個後背門有得老鼠咬一個大空哦！睺著咬壞個紗門，心肝頭一下子搵纏纏，像著著釣個款，氣硬討敵毋會出來。老鼠係僱細子時個歹夢，本來想講這下躑高樓即毋會有老鼠，無想著道高一尺，魔高一丈，這隻老鼠魔，正經係無想討得僱好過年！

猶記得遐正過年了個烏昏，輪著僱燻燒水，阿姊渡阿弟、阿妹去禾坪，和大落屋內底個細子，共下賞點膨嬰和踢銅笏，留僱一個人在灶下燻樵。顧火個事頭實在真無心色，目珠尾睺著菜櫥內底有幾下埕炙燥個甜版乾，即提火鉗拗甜版夾躑用火烘。金黃色個甜版開始結疔，一兜仔臭火煙個味真錫人食。正烘好個甜版會燒手，無法度落嘴，即隨手園在灶頭面上得佢冷。

灶頭面上猶有一碗阿依下晝燻個豬油，猶燒暖燒暖。僱偷添半碗冷飯，攪一湯匙豬油和豆油，坐在灶頭下个矮凳面上，一下子即划淨淨。伸手去提遐埕甜版，手嘎得重鉤重鉤四支腳生毛個物件蹬過去。僱想若像係貓，手一拂，無想著跌在僱面頭前個係一隻像貓恁大隻，會驚死人個老鼠。作穡人個屋下有老鼠毋係麼

個怪奇個事情。恬恬倉庫一打開，即會睺著一陣老鼠從上從落。割禾個時務，飯桌面上燻燥個老鼠肉猶真落飯咧。現時這恁大隻個老鼠，毋知偷食僱屋下幾多袋穀，仰子會像貓恁大隻。

這隻老鼠，腳手足緊個！尾一躑即跋上灶頭，咬著僱個甜版，順煙筒笏，跋到棚嶼。甜版無去無要緊，無幾久這隻老鼠擱趑倒轉來，趑到煙筒笏，頭那向下，尾在面上，睺著僱擎火鉗直撥，佢個嘴擘到大大，真像討和人拚生死個款。僱嚇佢毋會走，不得已即走出去尋大人鬥相共。無想著，僱一走開腳，灶下著火啊，好得阿哥睺著，大家鬥擻水來潑正無燒起來。遐暗夜，僱無飯好食。好得烏昏時有偷食半碗飯，若無，夜恁長愛仰子正好？阿怙罰僱在灶君爺頭前跪，無人相信有恁大隻個老鼠。僱若跪若矮，跪到兩支腳烏青，第二日腳即毋會行啊。到這下，老鼠和僱個冤仇結大啊。

為著毋得屋下變老鼠藪，僱隨走去五金行買幾下埕黏鼠枋，擱在枋個中央園一細撮地豆。第三日晨早，後背門正經黏著一隻老鼠，老鼠尾猶拂啊拂。遐對老鼠目，猶係惡豺豺個睺著僱，毋過，這擺僱贏啊。